

JAMES

¹ Yinga James, Altjirraka pa Ingkarta Jesua Kristaka urrkapunhapunha nama. Atha pepa nhanha yairnama Israel-aka ramarama 12-urna, etnala pmararrpaninhala namanga. Tjina ntjarrai, arrkana kuta narrirrai.

Arrkarnintjiperra

² Tjina ntjarrai, rrangkarrataka arrkana inthorra nitjika, errintjala, lherrintja kornala, relhalalka paka rrangkarranha arrkarnamanga.

³ Rrangkarra kala kaltja etna rrangkarranha arrkarnitjina. Rrangkarra pula etnaka itja kangkwerramanga, rrangkarra ekarlterritjina.

⁴ Nhanha turta. Rrangkarra Altjirranha ekarltalkura tnakitjina. Rrangkarra turtantama tnoatnoa inthorra nitjina.

⁵ Nthakinhama Altjirranha antja nama nurna ntelalhitjika? Tnakanhakanha arrpunha paka itja kaltjanga, era kala Altjirrurna ingkitjika. Era erinha kala ilitjina. Era turta erinha itja rralthitjina, era kangkintja warta namanga.

⁶ Nhanhanta pula. Era itja Altjirrurna wara ingkitjika, nhanga lakinha eterramala, "Atha erinha wara pmarriai. Thunga era yinganha wutjina." Era kala tnakitjikanta Altjirralla erinha wutjinala. Arai, relha erala Altjirrurna wara ingkama, era kala kwatja inmarra ngerra nama, wurinyalala ngalhelama.

7 Relha nhanhala itja etarlaritjika Altjirrala erinha wutjina.

8 Erataka eterrintja tharrakartarrpa nama, tjakatjaka inthorra.

9 Tjina tnakanhakanha erala ilkgara namanga, era arrkana nitjika, era Altjirraka tjina namanga. Era turta arrkana nitjika era Altjir-ranga urlarra netaneta namanga.

10 Kanha tjina tnakanhakanha, erala netaneta namanga, era arrkana nitjika era Altjirranga urlarra relha ilkgara ngerra namanga. Yultha ekuranha kunha kala antatha ngerra yirran-hitjina.

11 Arai, lirngga rratamalanga, thurrkarala turta warnamalanga, antatha etna ntjirrkerramala arnurna tnyinama. Etna itja wotha intorta nama. Lakinha ngerra relha netanetaka yultha turta yirritjina, relha netaneta era urrkapurlanamalangantema.

12 Relha erala Altjirranha ekarlta kuta tnakama, relhalalka erinha arrkarnamalanga, erinha Altjirrala lyekarrilitjina. Era turtantama Altjirralela ngampakala etatha nitjina, relha lenha ntjarralela, etnala Altjirraka kangkakala.

13 Relha arrpunhala relhanha arrkarnamalanga, relha era itja angkitjika, "Altjirrala kunha yinganha arrkarnama, korna ntelalhitjika." Arai, errintjala yarna Altjirranha arrkarnama, korna ntelalhitjika. Altjirrala turta itja inthorra relhanha arrkarnama, korna ntelalhitjika.

14 Relha erarrpataka kornaka lherrama.

¹⁵ Kurunga era lherrintja korna ekuranhaka kangkwerramalanga, era kala korna ntelalhamantama. Ingkarna, era paka kuta korna ntelalhamanga, Altjirrala erinha imilitjinantama.

¹⁶ Tjina ntjarrai, rrangkarra itja relha orrtjalthaka kangkwerritjika.

¹⁷ Arai, Kaarta alkirarinyalanta nurnanha yearriperra marra ingkarraka nthama. Era lirnga, taiyalka arrpmarnaka. Taiyalka etna pula kngartiwulhama. Kanha Kaarta alkirarinya era itjala kngartiwulhama.

¹⁸ Kaarta erarrpa antja nakalanga, era nurnanha inaka katjia ekuriltjantama nitjika. Era nurnanha lyartinyilaka angkatja nthurrrpa ekuaranharlarlanga. Lakinhangana nurna kala relha tweta ekuriltjantama nama.

Rrangkarra Altjirraaka angkatjaka kangkwerritjika, itja angkatja erinha wurlanitjikanta

¹⁹ Tjina kangkintja ntjarrai, rrangkarrataka thakeritjika wutjika. Rrangkarra pula itja parrpa angkitjika, parrpa yirrkngerritjika paka.

²⁰ Arai, relha erala yirrkngerrama, era itja arratja ntelalhama, Altjirranhala antja namanganerra.

²¹ Rrangkarra turta korna eteritjala narrirrai, korna ntelalhitjala turta. Rrangkarra pula Altjirraaka angkatja nthurrrpa ekura ilporatha kangkwerrai. Altjirrala kala angkatja nhanha eterintja rrakangkarranhaka kurnaka. Angkatja nanhala rrangkarranha irrpalthala tangkalhelama.

²² Rrangkarrataka Altjirraaka angkatjaka kangkwerritjika. Rrangkarra itja angkatja

erinha wurlanitjikanta. Rrangkarra paka angkatja erinha wara wurlanamanga, rrangkarra orrtjapepilalhamanta.

²³ Arai, relha erala Altjirraka angkatja wara wurlanama, era pula itja angkatja ekura kangkwerrama, era kala relha lenha ngerra nama, erala anngerra ekura mirror-ala arama.

²⁴ Kurunga lhamala ngerra, era kala anngerra ekuranhaka kngwerrama.

²⁵ Relha era pula, erala Altjirraka angkatjaka ilporatha kaltjerrama, ekura turta itja kngwerrama, kangkwerrama pula, erinha Altjirrala lyekarrilitjina. Ekura turta ilparnintja itja wotha intitjina.

²⁶ Thunga arrpunhala etarlarama era tnakanhakanha ilporatha namanga. Era pula kuta lhurrrkurta angkama, yia turta ilarlapuma. Arai, relha nhanha era itja tnakanhakanha ilporatha nama. Era wara orrtjapepilalhama.

²⁷ Relha erala antja nama Altjirra Kaartanga urlarra tnakanhakanha ilporatha nitjika, erataka lhompaka, warlukurtaka turta tangitjala nitjika, etna imampurla namalanga. Era turta lherrintja korna ingkarrakanga ntarntaralhitjika.

2

Rrangkarra itja relha netanetaka kangkitjika, kanha relha ilngaranha lolowutjika

¹ Tjina ntjarrai, rrangkarra kunha Jesua Kristanha, Ingkarta makalaria nurnakanha, tnakama. Rrangkarrantama itja relha arrpunhakanta kangkitjika.

² Thunga rrankarra pepaka worlerrakala nama. Artwa netanetantama irrpentjima, mantarra ntjatjintjakarta. Gold kaarntakaarntakarta turta iltja kantja ekuranhala. Kurunga artwa ilkngarantama irrpentjima, mantarra ulpur-takarta.

³ Rrangkarrantama artwa mantarra ntjatjintjakarturna angkama, "Katha marra nhanhaka arrarnalhai." Kanha artwa ilkngarurna rrankarra angkama, "Tanhala itnarlathanai. Ingka nukanhanga kutaka paka arrarnalhai."

⁴ Rrankarra paka lakinha angkamanga, rrankarra paala eterrama, paala kuta turta ntelalhama. Rrankarra kala tjiperrawunhawunha korna ngerra nama. Rrankarra angkama relha netaneta era kula marralkura namanga, relha ilkngarangatjina

⁵ Tjina kangkintja ntjarrai, etarlararrkai. Altjirralla kunha relha ilkngara ntjarranha ur-raraka erinha ekarlta tnakitjika. Era turta etnanha lhelaka, etna anma pmara ekuranhurna irrputjinala, pmara nhanga erala urrkapukala relha ekura kangkamala ntjarraka.

⁶ Kanha rrankarra relha ilkngara ntjarranha lolowumala. Rrankarra kala kaltja, relha netaneta etna kunha rrankarranha nakapakarlilama. Etna inthorranterna rrankarranha court-urna kngama.

⁷ Etna inthorra turta Ingkarta nurnakanha arrampowuma.

⁸ Altjirraka Angkatja Imankinyala ilama, "Unta relha arrpunhaka kangkitjika, untala unkwangarrpa kangkamanga ngerra." Nhanha Al-

tjirraka turnintja tjiparra inthorra. Rrangkarra turnintja nanhaka arratja kangkwerramanga, rrangkarra marra ntelalhama.

⁹ Rrangkarra pula relha arrpunhakanta kangkamanga, kanha relha arrpunhanha lolowumanga, rrangkarra kornala ntelalhama. Rrangkarra turta Altjirringa urlarra relha kornarintja nama.

¹⁰ Arai, unta paka Altjirraka turnintja ingkarraka inthorraka kangkwerramanga, turnintja nyintakanta pula itja, unta kala Altjirringa urlarra ilkarrtja kuta nama.

¹¹ Altjirra erala nurnanha ilakala, “Unta itja relha arrpunhaka noalela intitjika,” erantema nurnanha ilaka, “Unta itja relha arrpunhanha errilknga tutjika.” Untantama noa unkwanganhalelanta intamanga, unta pula relha arrpunhanha errilknga tumanga, unta kala Altjirringa urlarra ilkarrtja nama.

¹² Altjirrala kunha rrangkarranha Yia Marra ekuranhamalkura tjiperrawutjina. Lakinhang rrangkarra angkitjika, ntelalhitjika turta nanhaka eterramala.

¹³ Relha erala itja montjamontja ntelalhama, ekura Altjirranha itjantema anma montjamontja ntelalhitjina. Altjirranha pula antja nama rrankangkarra montjamontja ntelalhitjika, itja rrangkarranha imilitjika.

Relha erala Altjirranha arratja tnakama, era kala Altjirraka kangkwerrama turta

¹⁴ Tjina ntjarrai, thunga arrpunha angkama, “Atha Altjirranha tnakama.” Era pula itja Altjirra kangkwerrama. Relha nhanhalataka Altjirranha itja arratja tnakama. Lakinhangata Altjirrala erinha itja tangkalhelitjina.

¹⁵ Arai, thunga tjina tnakanhakanha unkwanganha mantarraka paalerrama, marnaka paka.

¹⁶ Kurunga unta erinha ilama, “Kala marra alpai. Mantarra marraka irrpai. Marna kngarra turta ilkwai.” Unta pula erinha itja mantarra, marna paka nthama. Iwunha pakama lakinha? Nhanha kunha palkala wara nama.

¹⁷ Lakinhangata relha paka angkamanga, “Atha Altjirranha tnakama,” era pula itja Altjirra kangkwerrama, era itja kuta Altjirranha arratja tnakama.

¹⁸ Thunga relha arrpunha angkama, “Unta Altjirranha tnakama. Yinga pula Altjirra kangkwerramala.” Atha erinha lakinha ilamara. Altjirranha tnakitjika, Altjirra kangkwerritjika turta, nhanha itjama twetakatweta nama. Nhanha kala nyinta ngerra kuta nama. Relha erala Altjirranha arratja tnakama, era kala Altjirra kangkwerrama turta.

¹⁹ Arai, unta tnakama Altjirra nyintanta namanga. Kala arratja. Errintja etna nhanha tnakamantema. Etna pula tirala errowuma.

²⁰ Rirtai, atha nganha ntelitjinantama relha erala eterrama era kula Altjirranha arratja tnakamanga, era pula itja Altjirra kangkwerrama turta, erataka itja arratja eterrama.

²¹ Unta Abraham-anha etarlarama? Iwunhangama Altjirrala erinha ilaka, “Unta nukanga

urlarra artwa arratja nama?" Era nhangha Isaac-anha altar-aka arrarnamala tutjika nakalanga.

²² Unta lhangkaramantama? Era kunha Altjirranha tnakaka, era Altjirraka kangkwerraka turta, porta kuta. Lakinhangha nurna kaltja era Altjirranha arratja tnakakala.

²³ Altjirraka Angkatja Imankinya ilama, "Abraham-ala Altjirranha tnakaka. Altjirralantama erinha ilaka, 'Unta nukanga urlarra artwa arratja nama.'" ' Altjirralla turtantama Abraham-anha ilaka, "Unta tjina nukanha nama."

²⁴ Rrangkarra lhangkaramantama? Nurna Altjirringa urlarra arratja nama, nurna ekura kangkwerramanga, itja nurna erinha tnakamanganta.

²⁵ Rrangkarra arrkutja Rahab-anha etarlarama, arrkutja tnapurta nhanganha? Altjirralla erinha ilaka, era ekuranga urlarra arratja namanga, era artwa pmarnaranha nhangha tharranha ntarntarakalanga, erinhatharra wotha pmarurna yairnarlenakalanga turta.

²⁶ Arai, mpurrka aiyangkintjakunya kala errilknga intama. Lakinha ngerra relha erala angkama, "Atha Altjirranha tnakama," era pula itja Altjirraka kangkwerrama, era Altjirranha palkala wara tnakama.

3

Linyiperra

¹ Tjina ntjarrai, rrangkarra itja thakerritjika ingkarraka kaltjinthanhinthanha nitjika. Etarlalai, Altjirralla kaltjinthanhinthanha nurnanha

tjiperrawumalanga, era nurnanha kngarralkura pmarritjina, ilparnitjina turta.

² Nurna ingkarraka korna ntelalhama. Relha era pula, erala itja paala angkama, era kala relha arratja inthorralla nama. Era turta itja lherrintja korna ekuranhaka kangkwerrama.

³ Unta paka nanthaka bridle ekarramanga, nantha era kala unkwanga kangkwerrama. Un-tantama nantha erinha bridle-ala turnamalanga ekngarra lhitjika, era kala ekngarra lhama. Al-torla paka, era kala altorla lhama.

⁴ Ship turta etarlarai. Ship kunha kngarritja inthorra nama. Wurinya ekarltalanta turta erinha latha lhitjika pauwuma. Ship-akakurtwiala pula ship erinha rretjingarlapuma, irna steering wheel kurrkala.

⁵ Relhaka linya turta kurrka nama. Ekurala relha kngarra inthorra tnakalhama.

Nhanha turta etarlarai. Uralkngantha kurrkala kunha matja kngarra inthorra etama.

⁶ Linya era kala lakinha ngerrantema nama. Rrakarta kwanala era kurrka nama. Ekurala pula relha angkatja korna kngarra inthorralla angkama. Linya erantama relha erinha kornilama, relha era turtantama kutatha imampurla nama. Errintja erarrpa kunha linya erinha korna angkitjika turnama.

⁷ Arai, relhala kala tnontha alharinya, thepa alkirarinya, irrpannga kwatjarinya turta kangkwerritjika kaltjinthama, arrpunha ntjarranha kala kaltjinthaka turta.

⁸ Kanha relhaka linya, relhala yarna inthorralla kangkwerritjika kaltjinthama. Linya era

angkatja korna angkama. Angkatja etna turta relhanha kornilama, arrangkulthala ngerra.

⁹ Linya nurnakanhala nurna Inkartanha, Kaarta erinha tnantjama. Linya nyinta ekurala pula nurna relhanha turta iltama, relha nhanga Altjirralala era ngerra inthorra arrpmarnakala.

¹⁰ Rrakarta nyinta ekuranga angkatja marra rratama, angkatja korna turta. Tjina ntjarrai, nhanha itja lakinha ngerra nitjika.

¹¹ Yinganha ilai. Kwatja kumia, kwatja peinta turta paka pentja nyintanga rratamama? Itja kunha.

¹² Irna tjurrkala paka marna langkwa lhalhelamama? Itja kunha. Irna grapes-ala paka marna tjurrka lhalhelamama? Itja kunha. Tjina ntjarrai, kwatja kumia, kwatja peinta turta itja pentja nyintanga thalalhama.

Relha era inangkarla nama, erinhala Altjirrala kaltjinthakala

¹³ Thunga rrangkarra etarlarama rrangkarra inangkarla namanga, kaltja turta. Kurunga rrangkarra yinganha ntelai rrangkarra nthurra inangkarla namanga, arratja ntelalhamala, Altjirra kangkwerramala, tjurnalhitjala namala turta.

¹⁴ Arai, rrangkarra paka relha arrpunhaka antjakunya namanga, rrakangkarrarrpanta turta kangkamanga, rrangkarra itja tnakalhitjika rrangkarra kula inangkarla namanga. Nhanha orrtjerrintja wara nama.

¹⁵ Altjirrala itjama rrangkarranha lakinha kaltjinthaka, errintjala pula.

¹⁶ Arai, rrangkarra relha arrpunhaka antjakunya namanga, rrakangkarrarrpanta turta kangkamanga, rrangkarra ingkarraka parrparterritjina, korna inthorrerritjina turta.

¹⁷ Altjirrala pula rrangkarranha kaltjinthamanga inangkarla nitjika, rrangkarra alknfaltara nitjina. Rrangkarra rilhera, ngwanga, antja pulya, montjamontja turta ntelalhitjina. Rrangkarra turta relha ingkarrakaka loala kuta kangkintja ntelalhitjina, pmathakunya.

¹⁸ Arai, relha erala rilhera kuta nama, era kala arratja ntelalhama.

4

Altjirrakanta kangwerrai, itja lherrintja korna rrakangkarranhaka

¹ Rrangkarra kunha turrama, iltarrama turta. Iwunhanga? Lherrintja korna rrakangkarranha, eterrintja marra rrakangkarranhalela iwurramanga warta.

² Rrangkarra yulthakalka lherrama, irna arrpunhaka turta antjerrama. Rrangkarrantama relha arrpunha ntjarraka enkama, yultha etnakanhaka. Etna rrangkarranha itja nthamanga, rrangkarra kala turrama, iltarrama turta. Rrakangkarra pula yultha itja intama, rrangkarra Altjirraka itja enkakalanga.

³ Kurunga rrangkarra nthurrpantama Altjirraka enkamalanga, Altjirrala rrangkarranha itja nthama, rrangkarra yultha kornaka enkakalanga. Rrangkarrataka money-akalka

wara enkaka, rrangkarra arrkana kornaka arrkaneritjinanga.

⁴ Rrangkarrataka Altjirranharrpa itja tnakama. Rrangkarra kala kaltja, relha erala alha nhanhaka yulthaka kngarralkura kangkamanga, era itja Altjirraka tjina nama. Lakinhanganga rrangkarra alha nhanhaka yulthaka kngarralkura kangkamanga, rrangkarra kala Altjirraka leltja nama.

⁵ Altjirraka Angkatja Imankinyala ilama, “Enka nhanganga Altjirralala relhanha arrkurla nthakala, enka nhanha erataka korna ntelalhitjika lherrama.”

⁶ Altjirralla pula nurnanha ekarltilama turta, nurnaka ngwanga inthorra ntelalhamala. Altjirraka Angkatja Imankinya arrpunhala ilama, “Relha erala Altjirranga urlarra tnakalhama, erinha Altjirralla unpuma. Kanha relha erala Altjirranga urlarra itja tjurnalhama, ekura Altjirranha ngwangala ntelalhama.”

⁷ Lakinhanganga rrangkarra itja Altjirranga urlarra tjurnalhitjika. Errintja erinha unpai, kurunga era kala rrakangkarranga tira lhitjina.

⁸ Altjirrurna ingkai, kurunga era rrakangkar-rurna etinyerritjina. Kornarintja ntjarrai, kala Altjirrurna topanterrai. Relha rrangkarralla Altjirraka pa alha nhanhaka yulthaka loala kuta kangkamanga, kala Altjirrakantantama kngarralkura kangkai.

⁹ Rrangkarra porerritjika, itnitjika turta. Rrangkarra itja tharritjika, nthorrkngerritjika

pula. Rrangkarra itja arrkaneritjika, ltarrperritjika pula.

¹⁰ Rrangkarra itja Altjirranga urlarra tjurnalhitjika, kurunga era rrankarranhatitja tjurnitjina.

Itja tjina tnakanhakanhiperra lhurrkurta angkitjika

¹¹ Tjina ntjarrai, rrankarra itja tjina tnakanhakanhiperra lhurrkurta angkitjika. Rrangkarra paka tjina rrankangarranhiperra lhurrkurta angkamanga, erinha ilamanga paka era relha korna namanga, rrankarrataka Altjirraka irrpaltherrama. Rrangkarra turta Altjirraka turnintja lolowuma. Arai, rrankarra paka Altjirraka turnintja lolowumanga, rrankarra Altjirraka turnintjaka itja kangkwerrama, rrankarra turta Altjirraka irrpaltherrama.

¹² Arai, Altjirrakathakanta nama relhanha turnitjika. Altjirrakathakanta turta nama relhanha tjperrawutjika, tangkalhelitjika paka. Nhanha itja rrankangarrathakalka nama.

Ingunthiperra eterramala, itja Altjirraka kngwerritjika

¹³ Rrankangarranga arrpunha ntjarra lakinha angkama, "Lyarta, inguntha paka, nurna kala town tanhurnantama lhitjina. Kurunga nurna pmara ekuralarrkantama kuterritjina. Nurnantama yulthalka yirrinthitjina, money kngarra turta patilitjina." Rrangkarra paka lakinha angkamanga, yinganharrka wurlathanai.

¹⁴ Inguntha nthakinhamerritjina? Rrangkarra kunha itja kaltja. Iwunha ngerra turtama

rrangkarra nama? Rrangkarra kunha ura kwarta ngerra nama. Rrangkarra kurrka wara nama, kurunga rrangkarra kala yirrama.

¹⁵ Rrangkarrataka lakinhaitja angkitjika, “Ingkartanha antja namanga, nurna kuta etatha nitjina. Nurna turta lakinha, lakinha mpaaritjina.”

¹⁶ Paala angkamalataka rrangkarra tnakalhama, tjurnalhama turta. Nhanha korna nama.

¹⁷ Arai, rrangkarra paka kaltja namanga arratja ntelalhitjika, rrangkarra pula itja aratja ntelalhamanga, rrangkarra kala Altjirranga urlarra korna ntelalhama.

5

James-ala relha netaneta ntjarranha lhalaraka

¹ Yai, yinga nhanha relha netaneta rrakangkar-rurnantama angkama. Rrangkarra kala it-nitjikanta, kngarra nthorrkngerritjika turta. In-guntha wara rrangkarra kala imampurlerritjina.

² Yultha rrakangkarra, etna kala kornerritjina. Intarrkala turta mantarra rrakangkarranha ilkutjina.

³ Gold pa silver rrakangkarra kornerritjina. Rrangkarra kunha yultha kngarra inthorra patilaka. Yultha nhanha etnantama rrangkarranha Altjirranga urlarra ilparnitjina, rrangkarranha urala ngerra mputjina turta.

⁴ Arai, artwa arrpunha ntjarra urrkapuka marna annga rrakangkarranha tnukulpala kotjitjika. Rrangkarra pula etnanha itja kwartiwuka. Urrkapunhapunha etnantama

nhanha Altjirraka alpmelaka. Ingkarta Ekarlta Inthorralla turta etnanha wuka.

⁵ Netaneta ntjarrai, rrangkarra kunha alha nanhala iltha marra inthorralla naka, yultha kngarrakarta. Kara kngarra tumala turta, rrangkarra kutatha tulhitjata.

⁶ Relha arratja ntjarra itja rrakangkarra ir-paltherraka paka. Rrangkarra pula etnanha imilaka, errilknga tuka turtala.

Rrangkarra kunpa nyingalauwutjika

⁷ Tjina ntjarrai, kunpa narrirrai rrangkarra kaaralhamalanga Ingkartanha pitjalputjika. Rrangkarra artwa etnanha etarlarama, etnala marna annga ingkairnama? Annga etnanha ingkairnamala, etna kala kunpantama kaaralhama kwatjalarrka nhitjika, kurunga marna etna turta urnmerritjika.

⁸ Rrangkarrataka etna ngerra kunpa kaaral-hitjika. Tnoatnoa narrirrai, Ingkarta-anha kala inguntha wara pitjalputjina.

⁹ Tjina ntjarrai, rrangkarra itja tjina tnakanhakanhiperra wannga ankitjika, Altjirralla rrangkarranha imilakitja. Arai, tjiperrawunhawunha era kunha inguntha wara kala pitjitjina.

¹⁰ Tjina ntjarrai, rrangkarra Altjirraka urrpia imankinya ntjarranha etarlarama, etnala relha ntjarranha Ingkartaka angkatja ilitjata? Etna ngerra ntelalhai. Etna Altjirraka kunpa kaaralhaka, etna nyingalauwumalangatanya.

¹¹ Arai, nurna kunha relha lenha ntjarranha tnantjama, etnala kunpa Altjirraka kaaralhakala.

Rrangkarra kala wuka Job-anhala kunpa Altjirraka kaaralhakala. Rrangkarra turta kaltja Ingkartala erinha ingkarna marrilakala. Arai, Ingkartanha kunha kangkintja inthorra nama, era turta nurnaka montjamontja ntelalhama.

Kala angkatja nthurrpanta angkitjika

¹² Tjina ntjarrai, atha rrankarranha nhanha angkatja ekarlta inthorralla ilama. Rrangkarra relha arrpunhalela angkarramanga, rrankarra itja angkitjika, "Altjirrala arama," angkatja arpunha era ngerra paka. Angkatja rrankangkar-rataka kutatha nthurra, arratjanta turta nitjika. Itjanga paka, Altjirrala rrankarranha imilitjina.

Tjina tnakanhakanhakawia Altjirurna ingkitjika

¹³ Unta paka nyingalauwumanga, Altjirurna ingkai. Unta paka arrkana wulhamanga, Altjirranha tnantjai, lyilhamala.

¹⁴ Unta paka menta namanga, kaltjinthanhinthanhaka ntangkalhai, ntarn-tarintjaka paka. Erinha ilai unkwangakwia Altjirurna ingkitjika, nganha ntirala parnitjika turta, Ingkartaka rretnya alpmelamala.

¹⁵ Arai, Altjirrala kala wuma relha ekururna ingkamalanga, erinha tnakamala. Erantama relha menta erinha marrilama. Relha menta era paka korna ntelalhakalanga, era korna ekuranha turta iwuma.

¹⁶ Rrangkarra urlarrakurlarra korna tjatjatulhitjika. Rrangkarra turta arrpunhakakwia Altjirurna ingkitjika, Altjirrala rrankarranha marilitjinanga. Arai, Altjirranhataka relha arratjaka kangkwerrama, era ekururna ingkamalanga.

¹⁷ Elijah-anha nurna ngerra naka, relha. Erantama Altjirurna ekarlta ingkaka kwatjala itja nhitjika. Kwatjalantama itja nhaka 3 years-aka, 6 months-aka turta.

¹⁸ Kurunga era wotha Altjirurna ingkaka. Kwatjala turtantama wotha nhaka. Marna, tharrka turtantama lyapuka.

Tjina tnakanhakanha paka Altjirranga ntjuma lhamanga, erinha ntangkai toperritjika

¹⁹ Tjina ntjarrai, tjina tnakanhakanhala paka Altjirraka angkatja nthurra impukalanga, erinha ntangkai, toperritjika.

²⁰ Era paka unkwanga kangkwerramanga, unta erinha kala tangkalhelaka. Altjirrala turta korna ekuranha, kngarra purrama, iwutjina.

**Altjirraka angkatja - Arrarnturna
kngartiwukala
The New Testament in the Western Arrarnta
language of Australia**

copyright © 1997 Bible Society of Australia

Language: Western Arrarnta (Arrarnta, Western)

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-05-14

PDF generated using Haiola and XeLaTeX on 18 Apr 2025 from source files dated 31 Aug 2023

e7dac67a-727e-547f-9edb-55e6c28bb3b9